

而其邑乃通津無可加降之彌故只破家瀦宅矣前日禁府堂  
上會賓廳議啓而奉承傳為之矣若今時始行宜謂之開端此  
有前例非開端之例也又傳于政院曰破家瀦宅必有前例今  
該司考啓○戶曹堂上啓曰丁酉年天使後所經之處貢物擇  
其可減者而量減矣今年亦以天使所經之處其減今年徭賦  
事傳教其擇可減者而量減耶抑全減耶敢稟傳曰今年天使  
所經之處受弊甚多今年徭賦其全減之○夜東方有氣如火  
○辛巳傳于政院曰守令僉使萬戶等專以侵漁為事不恤軍  
民莫此時若也黜陟嚴明則必皆謹慎民亦蒙惠矣不可以事  
事罷職嚴明黜陟並諭中外○壬午憲府啓前事不見○傳于  
政院曰明日大臣以拜表當到闕以臺諫所啓及予所答之意  
議大臣以啓憲府所啓破家瀦宅事○癸未遣戶曹參判鄭世虎賀聖  
節工曹參判李清欽問遠行南服起居兼謝陪臣賜宴○領議  
政尹殷輔左議政洪彥弼議啓曰趙萬齡既犯律文所無之罪  
當伏律文所無之典所以破家瀦宅欲並與其凶穢之迹而減